

每週經課朗誦經文(巴克禮漢羅/教羅)2012/12/30

共同經課 - 1 撒母耳記上二章十八節~二十節，二十六節

18Hit 時撒母耳 iáu 細漢，穿幼苧布 ê í-hut-tek, tī 耶和華 ê 面前服事。19Koh 伊 ê 老母 ták 年 kā 伊做一領細領 ê 長衫；kap 伊 ê 丈夫上來獻年祭 ê 時，帶來 hō伊。20Í-lī kā Í-lī-ka-ná kap 伊 ê bó祝福，講，願耶和華對 chit-ê 婦人人 koh 賞賜你後裔，來替所還 hō耶和華 ê。In 就 tò 去本所在。26Gín-ná 撒母耳漸漸大漢，得 tiòh 耶和華 kap 人 ná 疼伊。

共同經課 - 2 詩篇一百四十八篇

1Lín tiòh o-ló 耶和華。Tùi 天頂 o-ló 耶和華；Tī 高 ê 所在 o-ló 伊。2 伊 ê 眾使者 ah, lín tiòh o-ló 伊。伊 ê 眾天軍 ah, lín tiòh o-ló 伊。3 日 kap 月 ah, lín tiòh o-ló 伊；發光 ê 星辰 ah, lín lóng tiòh o-ló 伊。4 天頂 ê 天, kap 天以上 ê 水 ah, lín lóng tiòh o-ló 伊。5Chiah-ê lóng tiòh o-ló 耶和華 ê 名；因為伊一下命令，就 lóng 受創造。6 伊將 chiah-ê 建立，到永永遠遠；伊有定例，boē 會廢無。7Tùi 地上 tiòh o-ló 耶和華，就是大魚 kap 一切 ê 深淵；8 火 kap 冰雹，雪 kap 雲霧；Thàn 伊 ê 話 ê 狂風；9 大山 kap 一切 ê 小山；結果子 ê 樹，kap 一切 ê 柏香樹；10 野獸 kap 一切 ê cheng-siⁿ；蟲 thoā kap 飛鳥；11 世上 ê 君王 kap 萬民；貴族 kap 世上一切 ê 審判官；12 少年人 kap 在室女；老人 kap gín-ná；13Chiah-ê lóng tiòh o-ló 耶和華 ê 名；因為只有伊 ê 名受尊做高；伊 ê 榮光 poāⁿ 過天地。14 伊興起伊 ê 百姓 ê 角，Hō伊聖 ê 百姓 lóng o-ló 伊，就是以色列人，親近主 hit-ê 百姓。Lín tiòh o-ló 耶和華。

共同經課 - 3 歌羅西書三章十二節~十七節

12Lín 既然 hō上帝所揀，是聖也得 tiòh 疼 ê，tiòh 用憐憫 ê 心，kap 仁慈、謙卑、溫柔、吞忍，來穿；13 設使 jī-pí 有 hiáp 嫌，就 tiòh 相寬容，相赦免；親像主 bat 赦免 lín, lín 也 tiòh án-ni。14Tī chiah-ê ê 頂面 tiòh 穿仁愛，就是完全 ê 結聯。15Tiòh hō基督 ê 和平 tī lín 心內做主，lín 受召成做一體也是為 tiòh chit-ê；koh tiòh 感謝。16Tiòh hō基督 ê 道理，tī ták 樣 ê 智慧，充滿 tī lín ê 心；用詩，用歌，用神 ê 賦，相教示相苦勸，tùi 恩典 tī 心內 teh 吟來 o-ló 上帝。17Koh 凡所做 ê，或是講或是行，lóng tiòh tī 主耶穌 ê 名來做伊；也 tùi 伊來感謝父上帝。

共同經課 - 4 路加福音二章四十一節~五十二節

41Ták 年 poāⁿ 過節 ê 時伊 ê 父母去耶路撒冷。42 到伊十二歲 ê 時，照節期 ê 例 lóng 上耶路撒冷。43 節期已經明白，in tò 去 ê 時，gín-ná 耶穌 iáu toà tī 耶路撒冷；伊 ê 父母 m̄知。44phah 算伊 tī 同行 ê 人 ê 中間，行一日 ê 路站；chiah tī 親戚 kap 相識 ê 人 ê 中間 chhē 伊。45Chhē 無 tiòh，就 tò-tng 去耶路撒冷 chhē 伊。46 三日後 chhē-tiòh 伊 tī 殿裡，坐 tī hiah-ê 先生 ê 中間，也 teh 聽，也 teh 問。47 聽伊 ê 人 lóng 奇怪伊 ê 聰明 kap 伊 ê 應答。48 父母看見伊就 gông-ngiáh；伊 ê 老母對伊講，Kiáⁿ ah, 你啥事 án-ni 款待阮？你看，你 ê 父 kap 我傷心 chhē 你。49 伊 kā in 講，啥事 chhē 我？Kiám m̄知我應該 tī 我 ê 父 ê 厝 mah？50 In boē 曉得伊所 kā in 講 ê 話。51 耶穌就 kap in 落去到拿撒勒，來承順 in。伊 ê 老母將 chiah-ê 話 lóng 記 tī 心裡。52 耶穌 ê 智慧 kap 年歲 ná 加添，上帝 kap 人 ná 疼伊。